

Þinggerð 61. ársþings Glímusambands Íslands – Framhaldsþing

Haldið í Íþróttamiðstöðinni Reykjavík 29. september 2025.

1. Þingsetning

Guðmundur Gunnarsson, formaður GLÍ, setti þingið kl. 13.10 og bauð forseta ÍSÍ, þingfulltrúa og gesti velkomna. Tuttugu og tveir einstaklingar voru mættir á staðinn, þar af 14 með atkvæðisrétt.

2. Kosning starfsmanna þingsins

Guðmundur lagði til að Valdimar Leó Friðriksson yrði þingforseti og var það samþykkt. Valdimar Leó lagði til að Svana Hrönn Jóhannsdóttir yrði þingritari. Kjartan Lárusson lagði til að Jón M. Ívarsson yrði þingritari. Var það samþykkt og tók hann til starfa.

3. Kjörbréf fulltrúa

Þar sem hér var um framhaldsþing að ræða voru engar nefndir kjörnar og fór þingforseti yfir kjörbréf þingfulltrúa. Voru flestir hinir sömu mættir og voru á fyrra þingi um vorið.

HSK Mættir voru Stefán Geirsson, Sigurður Þór Emilsson, Kjartan Lárusson, Ólafur Oddur Sigurðsson og Kristinn Guðnason.

ÍBR Mættir voru Sigurjón Leifsson og Ásgeir Víglundsson. Varamenn: Rögnvaldur Ólafsson, Helgi Bjarnason og Óttar Ottósson.

UDN Mætt voru Svana Hrönn Jóhannsdóttir og Jóhann Pálmason. Jóhanna Vigdís Pálmadóttir var fulltrúi á þinginu gegnum fjarfundabúnað.

UÍA Mætt voru Guðjón Magnússon, Kristín Embla Guðjónsdóttir, Atli Már Sigmarsson, Eva Dögg Jóhannsdóttir og Hákon Gunnarsson.

Gestir þingsins voru Willum Þór Þórsson, forseti ÍSÍ, Heiðrún Fjóra Pálsdóttir og Adam Ólafsson. Alls voru því 23 á þinginu.

4. Reikningar lagðir fram

Svana Hrönn Jóhannsdóttir, gjaldkeri bráðabirgðastjórnar GLÍ, sagðist gera sér grein fyrir því að sú stjórn sem sat fyrir vorþingið bæri ábyrgð á því að hafa ráðið Jönu Lind Ellertsdóttur til starfa sem framkvæmdastjóra og það hefðu verið mistök. Svana tók að sér gjaldkerastarfið í bráðabirgðastjórninni sem tók við mjög erfiðu búi. Hún sagði stjórnina hafa verið heppna að fá Sigmund Stefánsson og síðan Arndís Arnórsdóttur viðskiptafræðing til starfa. Vonaði að umræður yrðu málefnalegar. Sagði óvíst að sum atriði reikninganna væru ólögleg en þarna hefði margt komið úr höndum framkvæmdastjóra sem stjórnin vissi ekki um áður.

Á þinginu lágu frammi fundargerðir bráðabirgðastjórnar frá 18. maí til 3. september, óundirritaðar og voru skráðar trúnaðarmál stjórnar. Þar kom fram að bráðabirgðastjórnin: Guðmundur Gunnarsson, Svana Hrönn Jóhannsdóttir, Jóhanna Vigdís Pálmadóttir, Kristín Embla Guðjónsdóttir og Marín Laufey Davíðsdóttir ásamt varastjórn Ásmundi Hálfðán Ásmundssyni, Heiðrúnu Fjólu Pálsdóttir og Ólafi Oddi Sigurðssyni höfðu lagt mikla vinnu í að reyna að koma lagi á reikningana svo hægt væri að leggja þá fram. Þau höfðu hist, ýmist í eigin persónu eða með fjarfundabúnaði á 12 fundum og hér var komin niðurstaða af vinnu þeirra en Arndís Arnórsdóttir, viðskiptafræðingur setti reikningana upp.

Sigmundur Stefánsson var kosinn á vorþinginu til að skoða reikningana og bera saman ið fjárhagsáætlun. Á minnisblaði hafði hann eftirfarandi við þessi skjöl að athuga:

1. Engir launaseðlar voru meðal fylgiskjala.
2. Styrkir og aðrar tekjur voru ofáætluð um rúma milljón í fjárhagsáætlun.
3. Á gjaldahlið reikninga voru **Glimukynningar** að upphæð kr. 6.532.747. Ljóst að þessi gjaldaliður var summa nokkurra bókhaldslykla. Langstærsti liðurinn í þeirri summu er **Mót erlendis** kr. 4.829.066. Í fjárhagsáætlun var liðurinn **Erlent samstarf og ferðir** kr. 500.000. Hér hefur verið farið langt fram úr áætlun. Gera verður alvarlega athugasemd við að reikningar sambandsins séu settir fram án þess að kostnaður vegna móta erlendis komi fram með skýrum hætti.

Verulegur rekstrarhalli 2023 og 2024 staðfestir að sambandið hefur ekki efni á að vera með starfsmann í fullu starfi allt árið og að kostnaður vegna móta erlendis verður að vera í samræmi við fjárhagsáætlun. Til að raunverulegur kostnaður við glímukynningar komi fram í bókhaldinu verður að sýna hve stór hluti af launum starfsmanns fer til þeirra.

Sigmundur Stefánsson.

Svana lagði fram nýja reikninga fyrir reikningsárið 2024. Voru þeir allmikið breyttir frá reikningum sem lagðir voru fram á vorþinginu, 10. maí síðastliðinn. Hún sagði að margar skilagreinar væru ókomnar, til dæmis væri ekki búið að innheimta allan kostnað hjá þátttakendum vegna utanferða, en talsvert hefði áunnist. Sambandið skuldar nú 8 milljónir.

5. Umræður um reikninga

Kjartan Lárusson þakkaði Svönu fyrir hennar störf. Það hefði verið mikil vinna að fara yfir reikningana. Hann sagði ranglega sagt frá glímukynningum og spurði hvað væri innifalið í skammtímaskuldum sem væru 2.6 milljónir. Kjartan gagnrýndi að í fundargerð GLÍ frá 20. nóvember 2024 hefði verið skýrt frá að það ætti að ræða fjármál af alvöru. En svo gerðist ekki neitt og næsti fundur var haldinn 8. apríl 2025 ! Þetta væri mjög alvarlegt og þarna hefði Guðmundur formaður algerlega vanrækt hlutverk sitt.

Svo gagnrýndi hann að GLÍ hefði gerst aðili að vafasömum erlendum samtökum þar sem sonur Erdogans Tyrklandsforseta væri í forsvari. Kjartan sagði: „Ég veit að í stjórninni er gott fólk og góðir vinir mínir en þau réðu ekki við verkefnið.“ Hann sagðist ekki ætla að segja fleira í bili.

Guðmundur Gunnarsson baðst afsökunar á þessu langa fundarhléi. Það væru hans mistök.

Atli Sigmarsson ræddi um erlenda sambandið. Taldi að farnar hefðu verið tvær ferðir til Tyrklands og spurði: Var það á kostnað GLÍ eða þessara samtaka? Hver borgaði?

Guðmundur Gunnarsson sagði að ferðirnar hefðu verið þrjár. Flugmiði og gisting hefði verið greidd af erlenda sambandinu.

Atli Sigmarsson sagði að þetta væri hvergi upplýst og vildi fá að vita hver væri tengiliður GLÍ í þessu máli.

Guðmundur Gunnarsson sagði þetta allt skipulagt af þessu sambandi sem vildi þjóðlegum íþróttum vel. Hann hefði talið þetta gott fyrir GLÍ.

Atli Sigmarsson sagði þetta engin venjuleg samtök. Þarna væru í löngum röðum ráðamenn einræðisíkja eins og Tyrklands og Belarús og við ættum ekki að koma nálægt þeim.

Guðmundur Gunnarsson sagðist ókunnugur pólitík erlendis. Þeir buðu okkur og við þáðum, skemmtileg tilbreyting, sagði Guðmundur.

Svana Hrönn Jóhannsdóttir upplýsti að umræddar skammtímaskuldir væru með fyrirvara ógreidd laun Jönu Lindar fyrrverandi framkvæmdastjóra.

Rögnvaldur Ólafsson undraðist að Jana Lind hefði verið ráðin framkvæmdastjóri og svo gerð að gjaldkera. „Hvernig datt ykkur þetta í hug?“ sagði Rögnvaldur.

Kristinn Guðnason taldi að þegar fólk kiknar undir störfum þá er bókhaldið það fyrsta sem gefur eftir. Taldi að það hefði átt að gjaldfæra skammtímaskuldir í ársreikningnum.

Valdimar Leó Friðriksson kvaðst ætla að hringja í bókarann og spyrja hana um þetta.

Ásgeir Viglundsson spurðist fyrir um lausafjárstöðu GLÍ í dag. Hann varaði við samskiptum við óþekkt sambönd og minnti á að eitt sinn hefði Lars Enoksen hinn sænski orðið til þess að 800 þúsund króna skuld féll á GLÍ.

Ólafur Oddur Sigurðsson upplýsti að hann hefði setið í bráðabirgðastjórninni sem var skipuð eftir þingið í vor. Þar naut hann góðs af því að hafa áður setið í stjórn og verið framkvæmdastjóri, ólaunaður að vísu. Hann sagði bráðabirgðastjórnina hafa staðið sig vel og skilað mikilli vinnu. Þar hefði verið mikil samheldni. Sagði Svönu hafa staðið sig afburðavel við að fara í gegnum alla þessa óreiðu. Sem dæmi þá var ekki búið að innheimta neitt fyrir eina einustu utanlandsferð. Hann sagðist hafa lagt til að leita í tölvupóstum GLÍ en Jana Lind var þá búin að eyða öllum tölvupóstum og þar var engar upplýsingar að hafa.

Ólafur sagði að ef við ætluðum að vera með afreksstarf í glímunni þyrftum við að vera með keppnir við erlenda fangbragðamenn og sækja hin föstu mót sem boðið er upp á í keltenskum fangbrögðum. Hann sagði að tíu keppendur hefðu verið ánægðir með að fjórir þjálfarar fóru með þeim til Englands og Skotlands og það hefði komið sér vel. Ólafur sagðist hafa í sumar farið með tvo unga menn til Sardiníu og allir borguðu ferðina úr eigin vasa. „Ef við ætlum að vera með afreksstarf þá verðum við að kosta einhverju til þess,“ sagði Ólafur.

Svana Hrönn Jóhannsdóttir svaraði Ásgeiri þannig að það hefði verið notaður vaxtareikningur fyrir inneign GLÍ og inni á honum væri nokkur upphæð.

Rögnvaldur Ólafsson sagði furðulegt að keppnisferðir erlendis væru kallaðar glímukynningar en svo væru engar glímukynningar innanlands þar sem mest væri þörfin og alls engar í skólum eins og eitt sinn var. Þetta gengur ekki sagði Rögnvaldur og hann kannaðist ekki við neitt landslið í glímu því menn eru ekki að keppa í glímu við útlendinga.

Atli Sigmarsson sagði að það væri ekkert afreksstarf í glímunni, sem væri í útrýmingarhættu. Hann var efins um að við ættum að vera með afreksstarf í erlendum samskiptum. Einnig lagði hann til að við segðum okkur frá þessum tyrknesku samtökum.

Ásmundur Hálfván Ásmundsson, fyrrverandi gjaldkeri, talaði gegnum fjarfundabúnað og sagði skammtímaskuldir vera arfleifð Jönu Lindar fyrrum framkvæmdastjóra. Hann sagði rétt að glímukynningar og erlendum kostnaður ættu að færast skilmerkilega í reikninga næst. Hann var ósáttur við að menn kæmu hér upp og töluðu um að hér væri ekkert landslið þegar landsliðsmenn hefðu einmitt skilað góðri frammistöðu.

Helgi Bjarnason kom upp og sagði frá því að hann væri með átta glímumenn í æfingum hjá KR. Svo væru æfingar hjá Ármanni og HSK, það gengi vel í glímunni.

Svana Hrönn Jóhannsdóttir sagði að það væri hlutverk framkvæmdastjóra að sinna glímukynningum en það hefði fyrrverandi framkvæmdastjóri ekki gert. Hún þekkti þetta vel frá því hún var sjálf framkvæmdastjóri.

Rögnvaldur Ólafsson vitnaði í skýrslu fræðslu- og útbreiðslunefndar í ársskýrslu 2023. Hann taldi að sú glímukynning sem þar var talin fram hefði verið fimm daga vinna. Spurði svo: „Hvað erum við að gera í samstarfi við Mjölni og brasilískt jújitsú sem á ekkert skylt við glímu? Svo kvaðst hann ekki ánægður með þessa svokölluðu bændaglímu við Hallgrímskirkju þar sem menn kútveltust hver um annan í einhverju hnoði sem enginn vissi hvað var.

Guðmundur Gunnarsson sagði að tímarnir væru að breytast og við yrðum að bregðast við því.

Rögnvaldur Ólafsson sagði að við ættum að vera með glímukynningar í grunnskólum en ekki einhver áflog við þá sem ekkert kunna.

Atli Sigmarsson taldi skólakynningar hafa runnið sitt skeið á enda. Hann sagði að Jana Lind Ellertsdóttir hefði unnið gott starf við að endurvekja glímuna í HSK.

Valdimar Leó Friðriksson bar reikninga undir atkvæði og voru þeir samþykktir með átta atkvæðum gegn tveimur. Fimm fulltrúar greiddu ekki atkvæði.

6. Ávörp gesta

Willum Þór Þórsson, forseti ÍSÍ kvaðst glaður yfir að vera hér með glímumönnum. Það væri ekkert annað sársamband með sérstakan styrk frá Alþingi til varðveislu íþróttarinnar. Þar væru menn sammála um gildi glímunnar. Umræða væri hreinskiptin. Sagði það mikinn skóla að hlusta hér á umræður. Þegar kæmi upp ágreiningur þyrfti að ræða hann. Mikil vinna að greiða úr þessum málum eins og hér hefur verið gert. Hann kvað sjálfboðaliðastarf á undanhaldi og þakkaði öllum sem hefðu komið að glímustarfi gegnum tíðina. Sagðist vera uppalinn í KR og hefði mætt þar á glímuæfingar fyrir hálfri öld en ekki átt séns í kappana sem glímdu þar og haldið sig við boltagreinar. Hann sagði að við ættum þennan æðri málstað sem glíman er og vitnaði í Hávamál. Minnti á að glímumenn hafðu stofnað bæði UMFÍ og ÍSÍ sem var einn þáttur í að við urðum sjálfstæð þjóð.

Willum óskaði Kjartani Lárussyni og fleirum til hamingju með viðurkenningar og heiður á árinu. Minntist einnig Harðar Gunnarssonar. Kvaðst ánægður að fá tækifæri til að hitta glímumenn á heimavelli og þakkaði mönnum þeirra góða starf við glímuna.

Þinghlé kl. 14.23. Þingi var fram haldið kl. 14.55.

7. Lög fram fjárhagsáætlun

Sigurjón Leifsson hafði framsögu fyrir fjárhagsnefnd sem var eina nefndin sem starfaði á þinginu og hafði fjallað um fjárhagsáætlun. Honum þótti lágar upphæðir í öðrum tekjum og styrkjum og menn yrðu að hafa metnað til að stunda eigin fjáröflun. Sigurjón sagði reyndar svo langt liðið á árið að stór hluti fjárhagsáætlunar væri orðin sagnfræði. Nefndin varð því sammála um að breyta fjárhagsáætlun ekki neitt.

Fjárhagsáætlun	2025 Gjöld	2025 Tekjur
Fjárveiting til glímukynninga		1.450.000
Tekjur af Lottó		4.000.000
Ríkisstyrkur - framlag til sérsambanda		3.000.000
Íþr. og Ólymp.samband útbr.styrkur		2.900.000
Styrkir		250.000
Aðrar tekjur		100.000
Laun (glímukynningar og fleira)	3.250.000	
Glímukynningar	1.450.000	
Erlendur ferðakostnaður	300.000	
Glímumót	1.000.000	
Ungmennaráð og ungmennabúðir	800.000	
Erlend samskipti	100.000	
Skrifstofukostnaður	1.300.000	
Tölvu- og tæknimál (heimasíða)	100.000	
Húsaleiga	900.000	
Ársskýrsla og þinghald	500.000	
Kaup á beltum, skóm og stökkum	200.000	
Samtals	10.100.000	11.700.000

Sigurjón Leifsson vakti athygli á því að tap síðustu tveggja ára væri tæpar 10 milljónir. „Ef svo fer áfram sem horfir verður sambandið gjaldþrota um mitt næsta ár,“ sagði hann. Hlutverk næstu stjórnar verður að stöðva þessa þróun.

Ólafur Oddur Sigurðsson var sammála Sigurjóni en benti á að bráðabirgðastjórnin hefði strax tekið til hendi í sparnaði. Hann sagði frá því að þegar hann gerðist formaður á sínum tíma 2008 hefði verið góður gjaldkeri, Sigmundur Stefánsson, en samt hefði sambandið verið rekið með tapi. Þá hefði hann sagt upp framkvæmdastjóranum og starfað sjálfur sem framkvæmdastjóri launalaust. Þannig hefði tekist að safna fé í sjóði.

Valdimar Leó Friðriksson bar fjárhagsáætlun upp og var hún samþykkt samhljóða.

8. Kosningar

Jón M Ívarsson bað um orðið og sagði Glímusambandið á tímamótum. Hann sagði að bráðabirgðastjórnin hefði unnið mikið og erfitt starf og vildi þakka henni fyrir sín verk. Hann hefði talið rétt sem fyrrum formaður að skipta sér ekki af störfum stjórnar, en um þessa óstjórn GLÍ gæti hann ekki orða bundist. Hann sagði fjárhag GLÍ hálfgerðar brunarústir og stjórnin hefði verið ósamstæð. Ekki væri betur séð en stjórnin fyrir vorþingið hefði verið á einhverju utanlandsævintýraferðalagi. Það væri auðvitað gaman að fara í utanlandsferðir og hver vildi ekki fara ókeypis til útlanda? En það yrði að vera grundvöllur fyrir þessum ferðum.

Hann sagðist hafa séð undarlega setningu í skýringum með svokölluðum ársreikningum: „80% ferða og launakostnaður er vegna glímukynningar í grunnskólum landsins.“ Þetta er ansi ódýr og ómerkileg lygi svo ekki sé meira sagt,“ sagði Jón. Í skýrslu fræðslu- og útbreiðslunefndar stendur: „Farið var í grunnskóla, framhaldsskóla, og háskóla en auk þess var glíma sýnd, kynnt eða kennd á hátíðum, mörkuðum og veislum. Helst ber að nefna *BJJ Globetrotters Icelandic Camp* sem framfer undanfarin ár í Mjölni.“ Hvílíkt bull !

Jón spurði: Hvar eru nöfn þeirra grunnskóla þar sem glímukynningar fóru fram, hver var fjöldi nemenda og hver sá um slíkar kynningar? Svo flutti hann skrifaðan texta:

„Gjaldkerinn, Jana Lind Ellertsdóttir, sem einnig var framkvæmdastjóri virðist hafa haft algjörlega frjálssar hendur um starfsemi Glímusambandsins. Vanrækt kynningar, lagt aðaláherslu á utanlandsferðir og farið óralangt fram úr fjárhagsáætlun með þeim árangri að fjárhagurinn er í rúst. Formaðurinn, Guðmundur Gunnarsson, sem á að hafa stjórnina virðist hafa verið óvirkur áhorfandi að öllu saman og ekki tekið í taumana. Reyndar stundum tekið sjálfur þátt í dansinum. Engir fundir voru haldnir og engar fundargerðir hafa sést í óratíma.

Ef Glímusamband Íslands væri skip mætti segja að það væri strandað. Yfirleitt er það svo að skipstjóri sem strandar skipi sínu segir af sér og ef hann gerir það ekki er hann settur af. Ég get því miður ekki séð að Guðmundur Gunnarsson sé rétti maðurinn til að halda um stjórnvölinn hjá Glímusambandi Íslands. Ég legg því til að Rögnvaldur Ólafsson taki að sér stjórn Glímusambandsins næsta árið og komi því á réttan kjöl.“

Valdimar Leó Friðriksson sagði að Rögnvaldur Ólafsson hefði verið boðinn fram til formanns.

Guðmundur Gunnarsson sagðist beygja sig fyrir því.

Ólafur Oddur Sigurðsson skoraði á Guðmund að bjóða sig fram til formanns og samþykkti Guðmundur það. Fór þá fram formannskosning. Fjórtán þingfulltrúar voru í salnum og Jóhanna Vigdís Pálmadóttir í fjarfundabúnaði var fimmtándi fulltrúinn.

Kosningar fóru þannig: **Rögnvaldur Ólafsson** hlaut 9 atkvæði. **Guðmundur Gunnarsson** hlaut 6 atkvæði.

Valdimar Leó Friðriksson tilkynnti að Rögnvaldur væri rétt kjörinn formaður Glímusambandsins og óskaði eftir tillögum um menn í stjórn. Rögnvaldur lagði til að fjórir stjórnarmenn yrðu: Sigurjón Leifsson, Kjartan Lárusson, Sigmundur Stefánsson og Lambi Haraldsson. Fleiri voru ekki tilnefndir og voru þeir sjálfkjörnir.

Kjartan Lárusson tilnefndi þrjá menn í varastjórn: Marteinn Kjartansson, Atla Sigmarsson og Jón M. Ívarsson.

Helgi Bjarnason bauð sig fram í varastjórn. Fór þá fram kosning milli þessara fjögurra manna og skyldi hver fulltrúi skrásetja þrjú nöfn.

Fjórtán greiddu atkvæði og tveir seðlar voru auðir. Kosningar fóru þannig að Atli Sigmarsson hlaut 12 atkvæði, Marteinn Kjartansson 11 atkvæði, Helgi Bjarnason 7 atkvæði og Jón M. Ívarsson 6 atkvæði. Voru þá þrír þeir fyrstnefndu rétt kjörnir í varastjórn.

Stefán Geirsson og Ásmundur Hálfðán Ásmundsson voru tilefndir skoðunarmenn reikninga. Stefán baðst undan kosningu og var þá Kristinn Guðnason tilnefndur. Voru þeir Ásmundur sjálfkjörnir.

Í Aganefnd voru sjálfkjörin Jóhanna Guðrún Magnúsdóttir, Jón B. Valsson og Ingólfur Narfason. Varamenn voru sjálfkjörnir Jón M. Ívarsson, Jóhannes Héðinsson og Magnús Ásmundsson. Var þá kosningum lokið.

9. Önnur mál

Jóhanna Vigdís Pálmadóttir talaði gegnum fjarfundabúnað. Hún óskaði nýrri stjórn til hamingju. Hún sagði að ekki væri hægt að breyta því sem gerðist í málefnum GLÍ og var ósátt við að umræðan á þinginu hefði mikið snúist um smáatriði sem ekki skiptu máli. Hún sagði að bráðabirgðastjórnin hefði staðið sig frábærlega og vildi þakka það góða starf sem þar hefði verið unnið og gott samstarf með félögum sínum.

Ólafur Oddur Sigurðsson óskaði Rögnvaldi til hamingju með kjörið og einnig þakkaði hann Guðmundi fyrir gott samstarf. Hann þakkaði enn fremur bráðabirgðastjórninni fyrir gott samstarf því þar lögðu allir sig fram. Hann skoraði á nýkjörinn formann að sýna þeim einstaklingum virðingu sem hafa keppt í landsliði og staðið sig vel sem fulltrúar glímunnar.

Atli Sigmarsson sagðist sammála Jóhönnu Vigdís í einu og öllu. Við værum lítið samband með fáa iðkendur og yrðum að standa saman ef glíman ætti að lifa af. Hann bar fram þá von að glíman vaxi og dafni.

Guðmundur Gunnarsson vildi þakka gott þing og óskaði nýrri stjórn velfarnaðar í starfi.

Willum Þór Þórsson, forseti ÍSÍ, sat allt þingið og vildi fyrir hönd ÍSÍ þakka fyrir sig. Honum þótti góður málflutningur fólks undir önnur mál. Hann þakkaði bráðabirgðastjórninni fyrir frábæra vinnu og að koma okkur á þennan stað og koma á þessu þingi. Þakkaði svo öllum viðstöddum fyrir góð störf og gott þing.

Kristinn Guðnason óskaði nýkjörinni stjórn til hamingju en sagði að það væri ekki sama að vinna kosningar og ná árangri í starfi.

Kjartan Lárusson byrjaði á að þakka bráðabirgðastjórninni fyrir þeirra góða starf en sagði að það væri líka mikið starf eftir áður en allt væri komið í samt lag. Hann sagði unglिंगastarfið í glímunni í lægð. Við hefðum farið í lægð á covid tímanum og ekki náð að rífa það upp aftur.

Svana Hrönn Jóhannsdóttir þakkaði bráðabirgðastjórn fyrir gott samstarf. Hún þakkaði Valdimar Leó Friðrikssyni fyrir gott samstarf, hann hefði verið haukur í horni. Hún óskaði nýrri stjórn til hamingju með kjörið en lýsti vonbrigðum yfir að þar væru engar konur.

Valdimar Leó Friðriksson þakkaði fyrir sig, þakkaði þingritara og gaf síðan nýkjörnum formanni orðið.

Þingið samþykkti einróma að fela þingforseta og þingritara að ganga frá þinggerð og undirrita hana fyrir hönd þingfulltrúa.

Rögnvaldur Ólafsson þakkaði kjörið. Hann þakkaði bráðabirgðastjórninni fyrir sín störf, einkum Svönu. Það hefði verið talað við konur um að koma í stjórn en þær hefðu ekki verið tilbúnar til að koma inn í starfið. Hann óskaði góðs samstarfs við alla innan glímunnar, óskaði þingfulltrúum góðrar heimferðar og sleit síðan 61. ársþingi/framhaldsþingi Glímusambands Íslands kl. 15.50.

Jón M. Ívarsson

Valdimar Leó Friðriksson